

清季外交史精

卷一

清

三

五

七

二

九

四

清季外交史料卷之二

光緒元年七月至八月

目錄

鄂督李瀚章奏奉諭查辦馬嘉理案赴滇日期摺七月二十四日

鄂督李瀚章奏英員馬嘉理被戕一案俟到滇後妥籌辦理片七月

二十四日

滇督岑毓英奏調李珍國來省候訊片七月二十四日

總署奏請飭李瀚章迅速赴滇查辦摺七月二十八日

總署奏請飭李鴻章在津與威妥瑪商辦滇案片七月二十八日

總署奏英使在津向李鴻章提出滇案六條藉端要挾片附節略二件

七月二十八日

總署奏英使曾面遞照會已分別照復片

附錄咸豐十年九月上諭七月二十八日

總署奏請派駐英國公使片附上諭七月二十八日

總署奏出使英國照會可否照出使法國原案辦理片八月初一日

總署奏駐京使臣與部院大臣往來禮節未便置之不議片

八月初一日

直督李鴻章等奏懇將前派出使英國及責問岑毓英諭旨酌量明

發摺附廷寄八月初八日

魯撫丁寶楨奏英法等國兵船來煙臺片八月十四日

滇督岑毓英奏英員馬嘉理被戕一案已獲兇犯贓物摺八月十六日

滇督岑毓英奏請飭總署照會英使轉飭柏郎等稍緩來滇游歷片

八月十六日

總署覆英使聲明中國於滇案確保持平辦理照會八月二十三日

總署奏英員馬嘉理被戕一案請飭李瀚章迅查覆奏摺

八月二十九日

總署奏陳中外交際往來情形請旨明白宣示摺

八月二十九日

鄂督李瀚章奏赴滇查辦英員馬嘉理被戕一案途次籌辦情形摺

附上諭八月二十九日

清季外交史料卷之三

黃巖弼夫王彥威輯

男希隱亮編

孫孝章敬立校

鄂督李瀚章奏奉諭查辦馬嘉理案赴滇日期摺

湖廣總督李瀚章奏爲恭報微臣起程赴滇日期事竊臣前奉諭旨飭令馳驛前赴雲南查辦英員馬嘉理被戕一案茲定於七月十八日起程因值江水盛漲改由水道經過湖南常德府桃源縣登陸取道貴州前進容俟抵滇後會同督撫臣確核案情秉公查辦另行具奏再臣此次赴滇時有與總理衙門及南北洋大臣咨商文件又案未訊結之先

須單銜奏事借用地方官印信諸多未便謹刊刻木質關防一顆文曰
欽差查辦雲南事件頭品頂戴湖廣總督關防以資鈐用而昭慎密合
併陳明謹奏光緒元年七月二十四日

鄂督李瀚章奏英員馬嘉理被戕一案俟到滇後妥籌

辦理片

李瀚章片 再正在繕摺間欽奉七月初六日寄諭總理衙門奏馬嘉
理被戕一案等因欽此臣查此案固須查明失事地方及下手正兇惟
閱外國新聞紙則指李珍國爲主謀且以其親姪帶兵爲言與兼署雲
貴督臣岑毓英奏稱野人殺害不無歧異是否彼族藉端要挾抑係事
出有因臣前已密致岑毓英以李珍國既係奏明緝兇之員應令親自

解犯晉省如已赴緬趕即調回有無指使情事必須訊問明確庶足以服彼族之心茲蒙諭飭岑毓英務令李珍國赴省待質仰見聖明洞燭幾先曷勝欽感至英國公使威妥瑪前遣參贊格維納至鄂與臣晤面先請爲馬嘉理伸冤次及柏郎被阻之事臣當以未奉諭旨爲詞答之雖柏郎與馬嘉理被阻被戕本是一事而正案尙未訊結又復議乃其餘深恐爲無厭之求必先抑其驕氣臣并面詢格維納當日馬嘉理由緬回滇途中既有險阻曾否預先知照地方派人迎護據稱未經辦過似此案之失其誤亦不盡在我臣現在未抵滇境虛實無從預決容俟到滇後勉竭懇誠察酌情形隨時商致總理衙門妥籌辦理謹附片密陳光緒元年七月二十四日奉旨

滇督岑毓英奏調李珍國來省候訊片

岑毓英片 再臣正繕摺間承准軍機大臣密寄光緒元年六月十二日奉上諭岑毓英奏查明馬嘉理被戕情形等因欽此伏查此案失事地方係在土司邊界僻處蠻荒距省遙遠臣前奏委署提督楊玉科迤西道陳席珍候補知府徐承勳前往查辦嗣據徐承勳會同永昌府知府朱百梅稟稱親到騰越廳蓋達土司蠻允一帶踏勘查得前項情節稟覆到省臣以邊地紳民聞警齊團雖屬常事而馬嘉理被野人刼殺適逢其會究難釋洋人之疑該廳文武官紳豈能置身事外當經一面據實奏明一面咨明楊玉科陳席珍等督同署騰越同知吳啟亮等拿犯追贓解省審辦不准藉詞推諉茲又加派署永昌協副將和耀曾馳

往守催拿解俟拿獲兇犯時將署騰越同知吳啟亮候補參將李珍國及騰越辦團紳管數人一併調來省城聽候欽差湖廣督臣李瀚章訊質總期供證確鑿認真辦理以折彼族之心不敢稍涉含混至威妥瑪帶洋兵來滇一層近據川黔委員探報均無確信其行或可中止即騰越亦迭據探報洋兵猶在緬國邊界只有一二千距雲南邊界尙遠臣已曉諭紳團毋得妄生疑畏現在地方安靜如常理合附片具陳謹奏
光緒元年七月二十四日奉旨

總署奏請飭李瀚章迅速赴滇查辦摺

總理各國事務恭親王奕訢等奏爲馬嘉理在雲南邊境被戕一案請旨飭下湖廣總督李瀚章迅速到滇查辦事竊查本年正月間馬嘉理

在雲南邊境被戕經臣等據情具奏欽奉上諭着岑毓英將此案確切查辦並着劉嶽昭迅卽回任會同該撫遣派明幹之員持平辦理毋得稍涉含糊欽此又於五月十六日欽奉上諭李瀚章著馳往雲南查辦事件等因欽此業經臣衙門恭錄諭旨咨行李瀚章暨滇省督撫遵照辦理在案查中國遇有命案亟應查明兇手供證確鑿按限定擬至與各國交涉案件尤應妥速辦理况中國與英國和好多年本年正月馬嘉理被戕案情重大自應將此案詳細情由確實查明以昭信讞所有案內應訊人證雖據岑毓英奏報已由騰越提集省城候質惟時閱半年之久未將實在情節確查具奏殊屬不成事體李瀚章甫經奏報七月十八日自湖北省城起程相應請旨飭令該督迅速到滇會同該省

督撫將此案實在情形一一查究明確具奏毋得再事耽延謹奏光緒元年七月二十八日

總署奏請飭李鴻章在津與威妥瑪商辦滇案片

總理衙門片 再此次威妥瑪在津李鴻章與之辯論時該使臣曾詢該督有無商辦之權李鴻章答以雖無商辦之權原無不可議論臣等因函囑李鴻章設法籌商頃於本月二十五日又據李鴻章函稱該使臣詞氣近日更加緊迫似豫挾一失和之見即進京再議恐其不易轉圜等語臣等竊計該使臣現在情形如果照李鴻章來函所稱是其要求過甚堅執不回將來到京與臣等辯論勢必無理取鬧一不遂意即悻悻然出京更恐難於就範因思該使臣既詢該督有無商辦之權可

否請旨飭下李鴻章如威妥瑪尙未離津卽將辯論各條妥商定議以顧大局理合附片具陳謹奏光緒元年七月二十八日

總署奏英使在津向李鴻章提出滇案六條藉端要挾

片附節略

奕訢等片 再英國使臣威妥瑪於馬嘉理被戕之案催辦甚緊更於案外藉端要挾臣等近接直隸總督李鴻章來函據稱威妥瑪於七月初二日到津迭經會晤威妥瑪論及雲南一案憤激不平之氣狂妄無理之言殊堪詫異因將與威妥瑪晤談節略鈔錄附寄臣等查節略內稱威妥瑪云在上海時曾著參贊格維訥往見湖廣總督據稱奉旨係查辦馬嘉理之事並不查副將柏郎被阻之事當經格維訥將總理衙

門會印執照二紙請湖廣總督閱看湖廣總督見其印色暗淡似有不甚相信之意又云騰越廳官員派兵阻路係接滿雲商人之信柏郎所鈔底稿此外憑證尙多又云不但雲南一事內外各處官民交涉各樣規矩情形俱要認真整頓改變好法各等語均由李鴻章逐層剖辯並經臣等函致李鴻章以威妥瑪如尙在津務爲設法密探就其著意之處迎機開導設有籌商卽由李鴻章相機而行仍由臣衙門主持緣在津商辦尙可操縱不似在臣衙門之毫無退步也嗣接李鴻章來函據稱初七等日與梅輝立威妥瑪先後會晤該使等謂有六條均須辦到滇事易結和局可保一須速派一二品實任欽差大員至英國通好說明滇案朝廷並無他意二遣派使臣必請明發諭旨使中外共知三雲

南地方調兵團阻擊柏郎戕害馬嘉理顯違總理衙門護照文函岑毓英事前失防事後失察應有處分請卽明降諭旨分別議處四派使臣赴英國應請道經印度與印度節度大臣說明滇事五緬滇交界道路須任英人通行應請中國使臣道經印度妥商邊界貿易章程六各國駐京公使擬請准與各部院大臣隨時交接應酬各等語經李鴻章答以岑毓英縱有處分須俟欽差大臣查明具奏方能降旨使臣繞道勢有不能明發諭旨不能懸擬邊界貿易須俟案定再商等因並據梅輝立述威妥瑪之意須先遣伊向總理衙門詢問各條如能照准威妥瑪再行回京李鴻章當令威妥瑪將面談各節書寫洋文節略並經譯漢文函寄前來臣等查此節略共七條與前所要六條大旨相同梅輝立

到京於十六日來臣衙門會晤敘及馬嘉理被害緣由仍指定李姓且露出李珍國名字並謂攻擊柏郎事尤重於殺馬嘉理所有自始至終詳細案由威妥瑪已查探確切遲日另有節略送來等語迭經臣等與梅輝立彼此辯論大略不外李鴻章與威妥瑪辯論之意查馬嘉理一案已逾六月迄無頭緒威妥瑪此次催辦雖尙在情理之中惟所要挾者均於案外生波將來威妥瑪到京後所有案中緊要關鍵彼族豈肯放鬆其時得步進步格外要求皆是意中之事李鴻章來函謂各條中擬酌允一二事俾有轉圜與臣等所見大略相似卽經往返函商如所云駐京公使與各部院大臣交接各口通商應令遵守條約各條當具節略答以俟威妥瑪到京再議由滇赴緬由緬赴滇派隊護送兩條臣